

आकाशवाणी

खास-खास खबरां

1. प्रधानमंत्री नरेन्द्र मोदी होरें आखेया ऐ जे सरकार नौजवानें लेई मुख ते विदेशें च रोजगार दे नमें मौकें पैदा करने दे प्रयास करा रदी ऐ। रोजगार मेला पैहलकदमी तैहत बक्खबक्ख सरकारी मैहकमें ते संगठनं च नमें - जहार 61 भर्ती होए दे नौजवानें गी नियुक्तिपत्र बंडे-।
2. यूरोपीय कमीशन दियां उप-प्रधान काजा-कल्लास त्रंऊ दिने दे दौरे लेई अज्ज भारत पुज्जियां। भारत नै आखेया जे इस दौरे कन्नै भारत ते यूरोपीय संघ दी सामरिक सांझ-भ्याली होर मजबूत होग।
3. बांगलादेश दियां साबका प्रधानमंत्री शेख हसीना होरें बांगला देश च अल्पसंख्यकें दी धार्मिक सुरक्षा गी यकीनी बनाने- हिंसा गी खत्म करने ते लोकतंत्र गी परतियै बहाल करने दी मंग कीती ऐ।
4. मुख भरै च राष्ट्रीय बालिका दिवस मनाया जा रदा ऐ।
5. ते क्रिकेट च महिला प्रीमियर लीग च अज्ज संजा वडोदरा च रायल चैलेंजर्स बैंगलूरु दा मुकाबला दिल्ली कैपिटल्स कन्नै होग।

<><><><><><>

PM Rozgar Mela

प्रधानमंत्री नरेन्द्र मोदी होरें आखेया ऐ जे सरकार नौजवानें लेई मुख ते विदेशें च रोजगार दे नमें मौकें पैदा करने दे प्रयास करा रदी ऐ। उनें आखेया जे भारत केंई होरनें मुखें कन्नै कारोबारी समझौतें करा रदा ऐ- जेदे कन्नै मुखे दे महारतयाफता नौजवानें लेई नमें मौके पैदा होगन। प्रधानमंत्री होरें एह गल्ल नमीं दिल्ली च 18में राष्ट्रीय रोजगार मेले गी वर्चुएल ढंगे कन्नै सम्बोधित करदे होई आक्खी। इस समारोह दौरान बक्ख-बक्ख सरकारी मैहकमें ते संगठनं च नमें भर्ती होए दे 61 जहार नौजवानें गी नियुक्ति-पत्र बंडे गो। मुखे दी बदा-मठोआ रदी अर्थबवस्था बारे गल्ल करदे होई श्री मोदी होरें आखेया जे भारत दुनिया भरै दी इकलौती अर्थबवस्था ऐ जिन्नै इक दहाके च अपने सकल घरेलू उत्पाद गी 2 गुणा करी लैता ऐ। 24 जनवरी दी महत्ता बारे श्री मोदी होरें आखेया जे अज्ज दे दिन संविधान नै जन-गण-मन गी राष्ट्रीय गान ते बंदे मातरम गी राष्ट्रीय गीत दे तौरा पर मान्यता दिती ही। रोजगार मेले बारे गल्ल करदे होई प्रधानमंत्री होरें आखेया जे ए इक ऐसा समारोह बनी गया ऐ जेदे च लक्खें बद्धे युवाएं गी बक्ख-बक्ख मैहकमें ते संगठनं थमां नियुक्ति-पत्र थोन्दे ना।

<><><><><><>

Gopi Rozgar Mela

सैलसफा मैहकमे दे केन्द्रीय राज्यमंत्री सुरेश गोपी होरें आखेया जे राष्ट्रीय रोजगार मेले दा मकसद युवाएं गी रोजगार दे बेहतर मौकें उपलब्ध करोआना ऐ। मंत्री होरें अज्ज तिरुवंतपुरम दे पल्लीपुरम च स्थित सी.आर.पी.एफ ग्रुप केन्द्र च आयोजित रोजगार मेले च शिरकत कीती। श्री गोपी होरें आखेया जे इनें नियुक्तियें कन्नै नां छडा युवाएं दा भविष्य सुरक्षित हुंदा ऐ सगुआं उन्दे च देश दे प्रति जिम्मेदारी दी भावना बी पैदा हुंदी ऐ।

<><><><><><>

PM Vishwakarma Hatt

प्रधानमंत्री विश्वकर्मा हॉट-2026 इस्सलै राष्ट्र राजधानी च चला रदा ऐ- जेहदा 31 जनवरी गी सम्पन्न होग। एह प्रदर्शनी खास तौरा पर कारीगरें गी समर्पित ऐ- जेहदे च मुखे दी रिवायती कारीगरी दी सगोसार संस्कृति गी प्रदर्शित कीता गेदा ऐ। एहदा मकसद कारीगरें गी अपने दस्तकारी उत्पादें गी राष्ट्रीय ते अंतराष्ट्रीय खरीददारें-हितधारकें ते आम जनता आस्तै खरीददारी करने लेई इक मंच उपलब्ध करोआना ऐ। सबनं राज्यों ते केन्द्र शासित प्रदेशें दे 117 शा मते कारीगर इस कार्यक्रम च हिस्सा लै करदे ना। इस प्रदर्शनी च “प्रधानमंत्री विश्वकर्मा योजना” दे लाभार्थियें लेई बजारें दी पुज्ज बधाने ते आजीविका दे स्थाई मौके पैदा करने दा बी जतन कीता गया ऐ। लोक इस प्रदर्शनी गी दिक्खने आस्तै बहुलै साड्डे 10 बजे शा लेइयै रातीं 10 बजे तक्कर जाई सकदे ना।

<><><><><><>

PM- Man Ki Baat

प्रधानमंत्री नरेन्द्र मोदी होर कल बडुलै 11 बजे आकाशवाणी पर अपने “मन की बात” कार्यक्रम राए देश-विदेश दे लोकें कन्नै अपने विचार सांझे करगंन। हर महीने दे खीरी ऐतवार गी प्रसारत होने आहले इस कार्यक्रम दी एह 130मीं किशत होग। कार्यक्रम दा प्रसारण आकाशवाणी ते दूरदर्शन दे समूलचे नैटवर्क- ए.आई.आर. न्यूज वेबसाईट ते न्यूज ऑन ए.आई.आर न्यूज- डी.डी न्यूज- प्रधानमंत्री हुंदे दफ्तर ते सूचना ते प्रसारण मंत्रालय दे यू-ट्यूब चैनलें पर बी होग। हिंदी प्रसारण दे बाद एहदा आकाशवाणी दे बक्ख-बक्ख केन्द्रें परा क्षेत्रीय भाषाएं च अनुवाद प्रसारत कीता जाहगा।

<><><><><><>

Murgun Youth Welfare

सूचना ते प्रसारण मैहकमे दे केन्द्रीय राज्यमंत्री डाक्टर एल. मुरुगन होरें आखेया जे नरेन्द्र मोदी हुंदी अगुआई आली सरकार नै युवाएं दी भले-बेहतरी लेई केई गैं पुट्टियां न ते उनेंगी रोजगार दे केई मौकें उपलब्ध करोआए ना। मंत्री होरें चेन्नैई दे कोल अवाडी थाहर आयोजित रोजगार मेले दौरान केन्द्रीय मंत्रालयें ते मैहकमें च भर्ती होए दे नमें मेदवारें गी नियुक्ति-पत्र सौपे। श्री मुरुगन होरें आखेया जे देश विकसित भारत आली बक्खी बदा रदा ऐ ते 2047 तोडी मुल्ल विश्व शक्ति बनी जागा।

<><><><><><>

EU-Prez

यूरोपीय आयोग दियां अध्यक्ष उर्सुला वॉन डेर लायन अज्ज दपैहरी अपनी अधिकारिक भारत यात्रा पर नमीं दिल्ली पुज्जियां। विदेश मंत्रालय दे प्रवक्ता रणधीर जायसवाल होरें इक सोशल मीडिया पोस्ट पर जानकारी दिती ऐ जे एह यात्रा भारत ते यूरोपीय संघ दी रणनीतिक सांझ-भ्याली दे नमें दौर गी अगडे बधाने पर केन्द्रित होग। उनें अग्गे आखेया जे भारत ते यूरोपीय संघ बश्कार आपसी बसाह-भरोसा ते सांझे-मुल्ल्ये-कदें पर आधारित मजबूत सांझेदारी ऐ। उर्सुला वॉन डेर लायन संगारें 26 जनवरी गी गणतंत्र दिवस समारोह च यूरोपी परिषद दे अध्यक्ष एंटोनियो लुइस सैंटोस दा कोस्टा हुंदे कन्नै बगैर मुख्क परौहने मजूद रौहगंन। दवै नेता इस महीने दी 27 तरीक गी होने आहली 16में भारत-यूरोपी संघ शिखर सम्मेलन दी सांझे तौरा पर अध्यक्षता करगंन। एहदे शा पैहले अज्ज बडुलै यूरोपी आयोग दे उप-प्रधान ते यूरोपी संघ दे विदेशी मामले ते सुरक्षा नीति सरबन्धि उच्च प्रतिनिधि काजा काल्लास बी नमीं दिल्ली पुज्जी गेन।

<><><><><><>

Ex PM Bangladesh

बांग्लादेश दियां साबका प्रधानमंत्री शेख हसीना होरें आखेया ऐ जे बांग्लादेश गी अराजकता- असुरक्षा ते अल्पसंख्यकें पर जुल्म दा सामना करना पवा रदा ऐ ते मुख्क भरै च हिंसा ते कट्टरवाद फैली गेदी ऐ। कल संजा नमीं दिल्ली च मीडिया कन्नै गल्लबात करदे होई शेख हसीना होरें आखेया जे बांग्लादेश इस्सलै अपने इतिहास दे सब्बनें शा खतरनाक ध्यायें चा इक खतरनाक कगार पर पुज्जी गेदा ऐ। उनें आखेया जे निरपक्ख चुनाएं राहें लोकतंत्र गी ब्हाल करने- हिंसा ते अराजकता गी खत्म करने ते अल्पसंख्यकें- महिलायें ते समाज दे सब्बनें शा कमजोर तबके दे हितें दी राक्खी करने दा आहवान कीता। उनें बांग्लादेश दे बसनीकें गी गुजारश कीती जे ओह हार नेंई मनन। उनें लोकतंत्र गी परतियै ब्हाल करने लेई जनता दा समर्थन हासल करने दी बी गुजारश कीती।

<><><><><><>

US –Pakisatan

अमरीका दे सीनेंटर मार्क आर वार्नर होरें अमरीकी विदेशमंत्री मार्को रुबियो होरें गी चिट्ठी लिखियै पाकिस्तान च जारी मनुक्खी अधिकारें दी खलाफवर्जी दे आरोपें पर चिंता प्रगट कीत ऐ। वार्नर होरें आग्रह कीता ऐ जे विदेश मंत्री राजनयिक कदम पुट्टन ते पाकिस्तान दी सरकार दे कन्नै राजनीतिक हस्तियें- पत्रकारें- ते कार्जकर्ताएं गी नशाना बनाए जाने- लोकें गी चुक्कियै गैब करी लैने ते उन्दे नै जुल्म-ज्यादतियें जनेए मामले आहले माड़े बरताव बारे गल्लबात करना। उनें आखेया जे पाकिस्तान च 2024 दे चुनाएं पर हिंसा-दबाव- दखल ते बेजाब्तियें दे आरोप न। उनें पाकिस्तान दे साबका प्रधानमंत्री इमरान खान हुंदी अगुआई आहली पाकिस्तान तहीके-ए-इंसाफ PTI दे समर्थकें गी नशाना बनाइयै कीती गेदियें कारवाइयें गी बी प्रमुखता कन्नै उजागर कीता।

<><><><><><>

Russia –Ukraine Attack

रुस आसेया कल रातीं कीते गेदे हमले च यूक्रेन च इक आदमी दी मौत होई गई ऐ ते 31 दुए घायल होई गेदे ना। एह हमले ऐसे समें च होए न जिसलै यूक्रेन- रुस ते अमरीका दे वार्ताकार दौने मुल्खे बश्कार लड़ाई खत्म करने लेई अबूधाबी च दुए दिन दी गल्लबात करा करदे ना। एह पैहली बारी मन्त्रेया जा रदा ऐ जे ट्रम्प प्रशासन दे अफसर दौने देशे दे प्रतिनिधियें कन्नै इक्के मेज पर आमने-सामने बेइयै लड़ाई खत्म करने लेई संजीदगी कन्नै जतन करै करदे ना।

<><><><><><>

Balika Diwas

अज्ज “राश्ट्रीय बालिका दिवस” ऐ। इस ध्याडें गी मनाने दा मकसद समाज च कुडियें दे अधिकारें ते उंदे सशक्तिकरण लेई जागरुकता फैलाना ऐ। एह ध्याड समाज गी बच्चियें प्रति इक बरोबर- सुरक्षित ते सशक्त माहौल बनाने लेई प्रेरत करदा ऐ- तांजे ओ राश्ट्र दे विकास च बरोबर दा योगदान देई सकन। महिला ते बाल विकास मंत्रालय नै पैहली बारी 2008 च इस ध्याडे दी शुरुआत कीती ही। प्रधानमंत्री नरेन्द्र मोदी हुंदे आसेया 22 जनवरी 2015 गी शुरु कीती गेदी “बेटी बचाओ-बेटी पढाओ” योजना दी बरेगंड हाल च गै मुल्ख भरै च मनाई गई। इस ऐतिहासिक पैहल दा उद्देश्य कन्या भ्रूण हत्या- बच्चियें दा लौहकी उम्री च ब्याह ते जागतें ते कुडियें बश्कार फर्को-फर्की जनेए गंभीर मुद्दें दा नबेडा करना ते बच्चियें दी शिक्षा-सेहत ते सुरक्षा गी बढावा देना ऐ।

<><><><><><>

UP Foundation Day

केन्द्री गृहमंत्री अमित शाह होरें आखेया ऐ जे उत्तर-प्रदेश नां छडा देश दी आत्मा ऐ- सगुआ विकसित भारत दा विकास ईजन बी बनने जा रदा ऐ। अज्ज लखनऊ च उत्तर-प्रदेश दिवस समारोह च शिरकत करदे होई गृहमंत्री होरें आखेया जे यू.पी. हून देसै दी 4थी सभन्तें शा बड्डी अर्थबवस्था ऐ ते मुल्खै च अन्नदानें दे भंडार च एहदा योगदान 20 प्रतिशत कोला मता ऐ। उनें आखेया जे उत्तर-प्रदेश च अज्ज परियोजनां समें बद्ध तरीके कन्नै तोड चढै करदियां न ते एहदे प्रगति मंच दी महत्वपूर्ण भूमिका ऐ। उत्तर-प्रदेश अज्ज अपना 77मां स्थापना दिवस मना करदा ऐ ते इस मौके पर राश्ट्रपति द्रौपदी मुर्मू-उप राश्ट्रपति सी.पी. राधाकृष्णन ते प्रधानमंत्री नरेन्द्र मोदी होरें इस मौके उत्तर-प्रदेश दे लोकें गी शुभकामनां दितियां ना।

<><><><><><>

Prez Address

राश्ट्रपति द्रौपदी मुर्मू होर कल 77में गणतंत्र दिवस दी पूर्व संजा राश्ट्र गी सम्बोधित करगंन। एह सम्बोधन शामी 7 बजे थमां आकाशवाणी दे सभन्तें राश्ट्रीय चैनलें परा प्रसारित होग ते दूरदर्शन पर बी एहदा हिंदी च प्रसारण कीता जाहग – जेहदे बाद अंग्रेजी च एहदा प्रसारण दूरदर्शन पर दस्सेया जाहग। दूरदर्शन पर हिंदी ते अंग्रेजी च सम्बोधन दे प्रसारण दे बाद- एहदे क्षेत्रीय चैनलें पर क्षेत्रीय भाषाएं च बी प्रसारण होग। आकाशवाणी पर एहदा राश्ट्रीय भाषाएं च प्रसारण रातीं साडडे 9 बजे प्रसारत कीता जाहग।

<><><><><><>

Rajnath -NCC

रक्षामंत्री राजनाथ सिंह होरें आखेया ऐ जे दुनिया अज्ज इक बेबसाही ते यक्को-तक्की आहले दौर शा लग्गा करदी ऐ जेहदे चलदे नौजवानें गी शारीरिक- मानसिक ते भावनात्मक तौर पर निग्गर रौहना लोडचदा ते हर चुनौती दा मकाबला करने लेई बी तयार होना जरूरी ऐ। अज्ज नमीं दिल्ली च NCC गणतंत्र दिवस कैम्प च युवाएं गी सम्बोधत करदे होई रक्षामंत्री होरें आखेया जे ओ दलेर ते समर्पित NCC कैडटें कोला प्रेरणा हासल करन जिनें आप्रेशन सिंदूर दे दौरान मुल्ख बरै च आयोजित मॉकड्रिल च आम लोकें च जागरुकता फैलाने च महत्वपूर्ण भूमिका अदा कीती ही। रक्षामंत्री होरें आखेया NCC दे एह कैडेट राश्ट्र दी रक्षा दी दुई पंक्ति ना। उनें आखेया जे भारतीय थेहारबंद बलें पाकिस्तान ते पाकिस्तान दे नजैज कब्जे आहले जम्मू-कश्मीर दे केंई हिस्सें च आतंकी ठकानें गी तबाह करियै पैहलगाम आतंकी हमले दा मूंह त्रोड परता दिता हा। राजनाथ सिंह हरें नौजवानें गी हुनर विकास दा इक शानदार जरिया बी दस्सेया। इस दौरान दीक्षा समारोह च कैडटें गी शानदार प्रदर्शन ते कारकरदगी लेई रक्षामंत्री पदक ते प्रशस्ति पत्र बी प्रदान कीते।

<><><><><><>

WPL

महिला प्रीमियर लीग क्रिकेट च अज्ज बडोधरा च दिल्ली कैपिटल्स दा मुकाबला रायल चैलेंजर्स बेंगलोर कन्नै होगा। मैच हुनै कोला किश चिर मगरा ठीक साड्डे 7 बजे शुरु होगा। दिल्ली कैपिटल्स गी प्लेऑफ दी द्रौड च बने रौहने लेई अज्ज जबरदस्त फार्म च चलै करदी बेंगलोर दी टीम खलाफ बडे शानदार प्रदर्शन दी लोड ऐ। दिल्ली कैपिटल्स नै अपने पिच्छलै मैच च मुम्बई इंडियंस गी 7 विकेटें कन्नै रहाइयै किश करी दस्सने दी सारत दिती ही। अजेंकि RCB दी टीम जिन्नै अजे तोडी अपने सारे मैचें च जित्त दर्ज कीती ऐ होसले बुलंद ना।

<><><><><><>

Cricket U-19 World Cup

जिम्बाब्वे दे बुलावायो च अज्ज खेड्डे जा रदे 19एं बरे कोला हेठली उम्मी दे क्रिकेट मैच च न्यूजीलैंड नै भारत दे सामने जित्त लेई 130 रन्ज दा लक्ष दिता ऐ। हुनै कोला किश चिर पैहले तगर भारत नै 12 इशारिया 3 ओवरें च 3 विकेटें दे नुक्सान पर 119 रन्ज बनाई लैते दे हे। एह्दे शा पैहले भारत नै टॉस जित्तियै पैहले गेंदबाजी करने दा फैसला लैता हा। विच्च बरखा होने कारण मैच 37 ओवर दा करी दिता गेदा ऐ।

IMD Weather

मौसम विभाग नै कल्लै लेई दिल्ली- चंडीगढ़- हरियाणा ते पंजाब च घनी धुंध छाई रौहने दी पेशनगोई करदे होई ऑरेंज अलर्ट जारी कीता ऐ। जिसलै जे हिमाचल प्रदेश-जम्मू-कश्मीर- लद्दाख ते उतराखंड च बी अगले दंऊ दिनें दौरान टांवी-टांवी थाहरें दरमेयाने दर्जे दी बरखा ते बर्फबारी दी चेतावनी बी जारी कीती गेदी ऐ।

<><><><><><>

H.P Snow

हिमाचल प्रदेश च भारी बर्फबारी दे कारण इक ज्हार 291 सड़कां बंद होई गेइयां न- जेह्दे कारण आम जनजीवन बुरी चाल्ली प्रभावत होआ करदा ऐ। लोकें गी आओ-जाई दे इलावा बिजली ते पामी दी कमी दा बी सामना करना पवा करदा ऐ। लोक निर्माण विभाग सड़क सम्पर्क बहाल करने च लग्गे दा ऐ ते इस लेई 385 मशीनां कम्मै पर लाइया गेदियां ना। हिमाचल च लोक निर्माण मंत्री विक्रमादित्य सिंह होरें जानकारी दिती ऐ जे मौसम विभाग आसेया बर्फबारी बारे कीती गेदी पेशनगोई गी ध्यानै च रखदे होई सरकारै मैह्कमे दे अफसरें कन्नै सलाह-सूत्र करियै पहाडी इलाकें च मशीनां तैनात करी देने दी योजना बनाई लैती दी ऐ। उनें सैलानियें अग्गे बी अपील कीती ऐ जे ओ गैर जरूरी सफर करने कोला बचना। रस्ते परा बर्फ हटाने दे कम्मै लेई दुए उपकरण ते मशीनां युद्ध स्तरै पर सड़क बहली दे कम्मै च लाई गेदियां ना।

<><><><><><>